

BO TA PLANEANDO PA BAI ORLANDO Y DISNEY WORLD CU BO FAMILIA? YAMA NOS PA E MANERA MAS VENTAJOSO!



VISTANA RESORT

TEL: 838116 / 838119 (Puntra pa Nelly of Jacky)



Un pilar cultural y un pilar deportivo menos riba nos Isla

Fin di siman Aruba a perde dos pilar grandi. Dos personahe cu nunca a gusta di ta den publicidad pa locual nan ta haciendo sinembargo ta personahenan cu riba nan tereno a haci hopi pa nos isla.

E prome ta Sr. Marcial Kock, conoci rond di nos isla como "Chai". Chai riba tereno cultural, principalmente riba tereno di baile y tambe baile di cinta, tabata un di e personahenan grandi. Un conocedor di nos folklore, y un tata di nos folklore.

Awe Chai lo ser hiba su ultimo lugar di sosiego, despues cu Dios a tume den Su reino despues di basta tempo cu e tabata sufri di quebrante serio di salud.

Un homber cu baile tabata su bida, e persona cu a pone e prome grupo di baile di nos grandinan riba pia y cu a cosecha exito riba islanan di Antiyas y na Venezuela...

Ta trata aki di e grupo di baile, **Flor di Palisia**. Ta despues di exitonan di Flor di Palisia, Aruba a cuminsa haya mas y mas grupo di nos grandinan riba tereno di baile.

Chai tabata masha activo riba e tereno aki y principalmente durante celebracionnan di fiestanan nacional, semper e tabata para cla cu tanto grupo di baile Flor di Palisia como cu gruponan di Baile di Cinta pa pasa rond di nos isla.

Semper e tabata cla pa yuda cualquier grupo cu ta y muestra nan e pasonan di nos bailenan. E tabata un di e caranan conoci pa hopi aña na **Bon Bini Festival**, mescos cu e otro pilar di baile Sr. Mimi Kock cu awe ainda ta activo cu su gruponan di nos grandinan.

Pa sa algo di nos musica, y nos bailenan, estilonan di antaño, y conservacion di nos estilonan di baile, Chai semper tabata cla pa duna un man. Semper tambe cu su humor, pasobra harimento y un bon chiste no por a keda afo cerca dje.

Hopi ta esnan cu awe ta sinti falta di e pilar aki, pero cu lo ser recorda cerca hopi como **"un bon tata pa nos cultura"**. Cu **"Chai"** sosega na paz.

GOLPI PA MUNDO DI DEPORTE Y CARNAVAL

Su ultimo ambicionnan tabata riba **"tereno di Carnaval"**, cu deseo pa mira un mehoracion di carnaval di Aruba y pa San Nicolas tin su propio organizacion independiente di Carnaval.

Esaki tabata loke por a tende ultimo añanan continuamente for di boca di Rosindo **"Buchi"** Rasmijn.

Buchi Rasmijn un conocedor grandi di nos Carnaval, un persona activo den carnaval pa sigur 40 aña caba, tambe a bisa Aruba ayo diasabra ultimo cu el a fayece.

For di aña 1948 cu **"Arabian Nights"** di Sr. Calvin Asan a subi caya, Buchi a mete su mes cu carnaval. E tabata un di e motornan grandi tras di grupo di Reina **Sidonia Muller** di Carnaval, y despues di fayecimento

di Sidonia hunto cu su ruman muher Yuyu a sigui mantene e grupo na bida pa hopi aña.

Buchi tabata esun cu a apoya masha hopi mucha homber y mucha muher di San Nicolas den añanan 50 y 60 pa join carnaval, y ta riba su indicacion hopi grupo a wordo forma tambe.

Buchi tabata un enciclopedia di Carnaval y por a contabo di delaster actividad, personahe y cu fechanan acerca y cantidad di anecdota awe lubida. Su ultimo actividad grandi pa carnaval di Aruba tabata **JUBU Happening** cu el a cuminsa e decada aki cune hunto cu Juan Werleman E JU di Juan y e Bu di Buchi, a wordo combina pa e nomber te cu awendia e ta un actividad oficial riba programanan di SAC, un actividad cu a haya su lugar na San Nicolas y caminda cantidad di nos artistanan a wordo honra.

DEPORTE DI SAN NICOLAS TABATA BUCHI

No ta solamente riba tereno di **Carnaval** Buchi tabata grandi. E tabata un gigante tambe riba tereno di Deporte. **Buchi a crea deporte** di San Nicolas. Tempo cu San Nicolas tabata biba solamente riba nan idolonan di futbol, San Nicolas Jrs. Buchi a yuda crea baseball, volleyball, atletismo, ping pong, tennis, basketball, cricket entre otro na San Nicolas. Mientras cu **Matheo Reyes** tabata e organizador cu Lago Sport Park Board, Buchi Rasmijn pafu di e murayanan tabata move cu juventud den Don Bosco Club pa hunto cu Matheo crea deporte.

Mayoría di astronan deportivo di San Nicolas a sali for di Don Bosco Club cu equiponan di ping pong, tennis, baseball cu Don Bosco Club, Esso y Caribbean Hotel cu Buchi a haci grandi, Volleyball di tur categoria di Don Bosco y Basketball cu hungadornan cu a pasa pa equiponan grandi di nos isla, principalmente Plymouth.

Hopi di e mihor tenistanan di San Nicolas y hungadornan di Ping Pong y di atletismo di Aruba a sali for di Don Bosco Club y cu Buchi Rasmijn como e motor y cu Hendrik Ponson (te awe activo) como conductor.

Hopi di nos baseballistanan cu den principio di añanan 60 a viaha pa campeonato mundial juvenil na Venezuela, Cuba, Santo Domingo entre otro, a ser traha na Don Bosco Club cu Buchi como dirigente y a viaha tambe den seleccionnan cu Buchi como dirigente.

Awe tur di nan ta contando nan yiunan y kizas nietonan, kende Buchi Rasmijn tabata y cuanto nan a siña di Buchi, principalmente riba responsabilidad y disciplina.

Buchi no tey mas, pero sigur ta cu na San Nicolas den tur skina ora papia di deporte, su nomber lo keda bin dilanti, pasobra Buchi a crea deporte na San Nicolas y lo keda reconoci pa esaki. Forza na su familia y rumannan y cu Buchi sosega na paz.

Juby